

PORT VILA

VANUATU GOVERNMENT

The Constitution Building, Lini Highway, PMB 9012 Port Vila

All general enquiries contact Tel: 67824573 Fax: 678 24574

Email: vatqueries@vanuatu.gov.vu

Web: <http://customsinlandrevenue.gov.vu>



VAT

Yu nid blong rejista o no?



Ol seksen insaed long buk ia

Peij

FESTOK

3

PART WAN – OLSEM WANEM BLONG REJISTA

OLGETA TAKISEBOL AKTIVITI

4

OLGETA TAKISEBOL SAPLAE

4

OLGETA SAPLAE WE OLI EKSEMPT LONG TAKIS

4

OLSEM WANEM BLONG KALKULEITEM TENOVA

4

HU NAO I MAS REJISTA LONG SAED BLONG VAT?

5

REJISTREISEN LONG TINGTING BLONG YUWAN NOMO

5

PAT TU – WOK LONG PEPA BLONG PRUVUM VAT

6

OL TAKISEBOL PERIOD

7

KLEIM BLONG OLI PEM BAK VAT

7

OL TAKIS INVOIS

7

OL DEITLAEN BLONG SENDEM OL VAT RITEN

7

WANEM NAO WAN MAN WE I REJISTA I MAS MEKEM

7

OLSEM WANEM BLONG FULMAP VAT REJISTREISEN FOM

7

AFTA BAMBAE WANEM I HAPEN?

8

PAT TRI – SAM MOA HELP MO/O INFOMESEN

8

Festok

Buklet ia i stap eksplenem long yu sipos yu nid blong rejista long saed blong **Valiu Aded Takis (VAT)** o no mo i stap talem long yu tu wanem nao ol gud saed mo nogud saed blong rejista long tingting blong yuwan nomo. Hemi tokbaot lelebet tu olsem wanem nao VAT i wok.

Sipos yu disaed blong rejista afta we yu ridim buklet ia, kam tekem aplikesen fom blong rejistreisen (CT 201) long Dipatmen blong Kastoms mo Inlan Revenu (VAT Ofis).

Sipos yu wantem save moa infomeisen, plis yu kontaktem Dipatmen blong Kastoms mo Inlan Revenu, VAT Ofis long VAT Hotlaen (678) 24573 o faks namba (678) 24574.

Buklet ia i kamaot festaem long manis Mei 1998 mo oli rivium o mekem sam jenis long hem bakegen long manis Jun 2005. Eni jenis we i tekem ples afta long Jun 2005 bae i no stap insaed long buklet ia.

PAT WAN - OLSEM WANEM BLONG REJISTA

VAT hemi wan takis we i aplae long konsamsen blong ol guds mo sevis long Vanuatu. Oltaem bambae oli jasem mo kalkuleitem long wan reit blong 12.5%.

Eniwan we i stap involv long wan takisebol aktiviti, o we hemi tingting blong involv long wan stat long wan deit we hemi save finis i stap, i save rejista long saed blong VAT.

Wan man we i mekem bisnis hemwan, wan kampani, patnasip, non-profit bodi o eni narafala oganaeseisen we i rejista long saed blong VAT yumi singaotem olsem wan "man we i rejista".

Olgeta man we oli rejista oli mas jasem VAT long ol kastoma blong olgeta mo oli mas kolektem ol mane blong VAT long bihav blong Gavman, oli mas fulmap mo sendem bak ol riten fom, mo pruvum se VAT we oli kolektem hemi stret amount long VAT ofis.

OLGETA TAKISEBOL AKTIVITI

Wan takisebol aktiviti hemi wan aktiviti we wan man hemi gohed blong stap mekem oltaem. Hemi mas saplaem, o tingting blong saplaem, ol guds o sevis long narafala man wetem tingting blong kasem bak wan samting (mane, kompenseisen, presen o eksjens) be bambae i no minim se i mas gat profit long hem oltaem.

Wan takisebol aktiviti i kavremap tu eni aktiviti insaed long wan bisnis, tred, faktri, profesonal, asosiesen o klab.

Ol samting ia oli no wan takisebol aktiviti:

- wok from salari o wejes;
- wok olsem kampani daarekta;
- ol hobi o eni praevet rikriesenal aktiviti;
- praevet sel olsem fasin blong salem long wanwan taem nomo ol samting long haus;

- mekem ol saplae we oli eksempt long takis (luk andanit).

OLGETA TAKISEBOL SAPLAE

Olgeta takisebol saplae hemi ol guds mo sevis we wan man o kampani i saplaem taem hemi stap mekem wan takisebol aktiviti. Olgeta saplaea we oli stap jasem VAT long praes blong ol guds mo sevis we i kat.

OLGETA SAPLAE WE OLI EKSEMPT LONG TAKIS

I gat sam guds mo sevis we ol man mo kampani bambae oli no mas jasem VAT long olgeta. Yumi stap singaotem olgeta olsem ol saplae we oli eksempt long takis. Sam long ol kaen saplae olsem ia i kat :

- wok blong wan non-profitebol bodi we i salem ol guds mo sevis we oli doneitem long hem;
- olgeta faenansol sevis;
- olgeta edukesenal institusen (inkludim skul fi)
- Ol lokol tua operata (kasem 30 Jun 1998 nomo)

Sipos yu wantem save moa abaot ol saplae we oli eksempt long takis, yu save kontaktem VAT Ofis long Dipatmen blong Kastoms mo Takis.

OLSEM WANEM BLONG KALKULEITEM TENOVA

Blong wokemaot se yu mas rejista long saed blong VAT o no, bambae yu nid blong kalkuleitem tenova blong yu.

Tenova hemi total valiu blong ol takisebol saplae we yu mekem, be hemi no gat VAT insaed yet. Insaed long wan nomol bisnis bambae tenova hemi total valiu blong ol sel mo inkam blong yu. Bambae hemi kavremap tu valiu blong eni grant o subsidi we yu kasem o eni samting we yu ekjensem wetem narafala man o kampani.

Yu mas kalkuleitem tenova long wan beisis we i no stop. Yu nid blong lukluk long tenova blong tu 12 manis period - ol 12 manis we oli pas finis mo ol 12 manis we i stap kam yet.

HU NAO I MAS REJISTA LONG SAED BLONG VAT?

Sipos yu stap mekem wan takisebol aktiviti insaed long Vanuatu, yu mas rejista wetem VAT Ofis insaed long Dipatmen blong Kastoms mo Inlan Revenu hemia sipos wan long ol samting ia i aplae long yu :

- Tenova blong yu long manis ia plasem tenova long las 11 manis i bitim 4 milian Vatu;
- Tenova blong yu long manis ia plasem tenova blong yu long nekis 11 manis i kam bambae i ova long 4 milian Vatu.

Tenova blong yu long wan manis hemi wan gudfala samting we yu save yusum blong faenemaot sipos tenova blong yu bambae i ova long 4 milian Vatu o no. Sipos tenova blong yu i kasem 333,000 Vatu long wan manis mo yu luksave se bambae yu gohed blong stap kasem amaon ia long evri manis, bambae yu nid blong rejista kwik taem.

Eksampol

Tenova blong ol 12 manis we i end long 31 Disemba 2003 i kasem 3.5 milian Vatu.
I no nid blong yu rejista

Yu stap lukluk se tenova blong ol 12 manis we i end long 31 Disemba 2004 bambae i kasem 3.8 milian Vatu.
I no nid blong yu rejista

Long manis Maj 2005 yu kasem ol niu kontrak.

Yu stap lukluk se tenova blong period stat long 1 Eprel 2005 go kasem 31 Maj 2006 bambae i kasem 4.5 milian Vatu.
Yu mas rejista bifo 21 dei i pas

Yu no nid blong rejista long saed blong VAT sipos wan long ol samting ia i aplae long yu :

- Tenova blong yu i bitim 4 milian Vatu long last 12 manis be long semtaem yu save pruvum se saplae blong yu long nekis 12 manis bambae i no kasem mak ia.
- Saplae blong yu i ova long 4 milian Vatu from wok o praes i bin go daon o from bisnis bambae i klos daon o from yu riplesem wan masin o kapitol aset.

Sipos yu mas rejista long saed blong VAT, yu mas mekem aplikeisen bifo 21 dei i pas afta we yu save se yu sapos blong rejista. Olgeta we oli no rejista long taem we oli sapos blong rejista long hem mo olgeta we oli fel blong rejista bambae oli mas pem ol faen o kasem panismen.

Sipos yu no rejista, yu mas lukluk mo jekem tenova blong yu long bigining blong wanwan manis.

Sipos tenova blong yu i kasem 333,000 Vatu long wan manis, mo i luk olsem se bambae tenova blong yu bai i semak long olgeta manis we i stap kam yet, bambae yu nid blong rejista.

REJISTREISEN LONG TINGTING BLONG YUWAN NOMO

Yu no nid blong rejista long saed blong VAT sipos takisebol aktiviti blong yu i gat wan tenova blong wan yia we i no kasem 4 milian Vatu, be yu save rejista sipos yu wantem. Olgeta long VAT ofis oli save askem yu blong yu givim sam moa infomesen long olgeta bifo yu rejista, olsem wan plan we bae i soem hamas mane nao yu ting se bae yu mekem long bisnis blong yu.

- **Ol gud saed blong rejista long tingting blong yuwan nomo**
 - Sipos yu pem ol guds mo sevis long wan man we hemi rejista, bambae hemi jasem VAT long yu

be bambae yu save kleimen bak VAT we yu pem. Sapos yu no rejista yu no save kleimem bak VAT we yu bin pem.

- Yu save kleim from VAT tu sipos yu pem ol seken-han guds long wan man we i no rejista mo yu yusum long ol aktiviti blong yu,
- Hemi helpem yu blong kipim gud ol rikod blong yu from evri manis yu mas fulmap ol riten blong yu mekem se ol rikod blong yu oli ap-tu-deit mo oli stret.
- Wan man we i pem VAT long bihav blong wan kampani we oli no setemap yet bambae kampani i save kleim bak VAT ia taem we oli inkoporeitem.
- **Ol nogud saed blong rejista long tingting blong yuwan nomo**

- Bambae yu nid blong pruvum long DKT se yu pem VAT long evri takisebol saplae blong yu wetem ol grant mo subsidi.
- Blong folem gud ol rul blong VAT i nidim plante taem.
- Yu no save kleim from VAT we yu spendem long saed blong ol saplae we oli eksempt long takis. Hemia i no wan gud samting sipos plante long ol saplae blong yu oli ol guds we takis i kavremap olgeta.
- Sipos yu disaed blong stopem rejistreisen blong yu, bambae yu mas pem VAT long eni aset blong bisnis we yu wantem kipim blong praevet yus. Rul ia i aplae tu long ol saplae we yu pem bifo long namba 1 Okis 1998.

PAT TU - WOK LONG PEPA BLONG PRUVUM VAT

Fasin we yu pruvum VAT long DKT oli stap singaotem se akaonting beisis. Yu save folem eniwan long tufala fasin ia blong pruvum VAT.

- ◆ Peimen beisis
- ◆ Invois beisis

I gat janis blong yu jusum insaed long Rejistreisen Fom weswan fasin blong pruvum Vat nao yu wantem folem from se i stret long yu.

- **Peimen (kas) beisis**

Long saed blong peimen beisis bambae oltaem yu mas pruvum VAT insaed long takisebol period we yu mekem o kasem peimen.

Eksampol blong peimen beisis

Kalo Davidson i salem ol pepa saplae long Folders & Files long 1 Okis 2004 mo hemi givimaot wan takis invois long sem dei ia. Folders & Files i mekem wan peimen long 4 Septemba 2004, Kalo i stap folem peimen beisis mekem se hemi pruvum VAT long saed blong sel insaed long takisebol period we i kavremap 4

Septemba 2004. Folders & Files i stap folem invois beisis mekem se hemi mas pruvum VAT ia long period we i kavremap 1 Okis 2004.

- **Invois (Akrual) beisis**

Sam pipol oli stap singaotem invois beisis olsem akrual beisis.

Long saed blong invois beisis bambae oltaem yu mas pruvum VAT long eli takisebol period we yu:

- givimaot o kasem wan invois, o
- kasem o mekem peimen.

Eksampol blong invois beisis

Rose Shem i salem ol kofi masin i go long Coffee Culture long 1 Septemba 2004 mo i givimaot wan takis invois long sem dei. Coffee Culture i mekem peimen long 4 Oktoba 2004. Rose mo Coffee Culture tufala i pruvum VAT long wanwan manis folem invois beisis. Tufala tugeta i mas pruvum VAT insaed long period we i kavremap 1 Septemba 2004.

OL TAKISEBOL PERIOD

Wan takisebol period hemi wan period we wan VAT ritin i kavremap. Ating bambae yu gat wan ritin period blong wan manis o tri manis. Sipos anuol tenova blong yu i ova o yu luk se bambae i ova long 8 milian Vatu yu mas sendem ritin evri manis. Be sipos tenova blong yu i no kasem amaon ia, yu save disaed blong sendem ol ritin blong yu evri manis o evri 3 manis.

KLEIM BLONG OLI PEM BAK VAT

Sipos yu wantem kleim from mane we yu spendem olsem VAT long wan ekspens blong aktiviti blong yu, bambae yu mas fulmap wan VAT ritin fom.

Sipos yu wantem mekem kleim from mane ia long ritin blong yu, bambae yu mas gat wan takis inouis we yu kasem wetem saplae ia. Gaed blong VAT hemi eksplenem moa wanem taem bambae yu no nidim wan takis inouis taem yu stap mekem kleim.

OL TAKIS INVOIS

Wan takis inouis blong VAT hemi wan ligal dokumen we i soem VAT blong wan transaksen. Yu mas gat wan takis inouis sipos yu wantem mekem wan kleim from wan VAT kredit long wan saplae we mane blong hem i ova long 5,000 Vatu (i gat VAT insaed). Olgeta takis inouis oli mas soem sam kaen infomeisen we Gaed blong VAT i tokbaot moa. Yu mas kipim oltaem ol risit o pepa we i pruvum ol peimen we amaon blong olgeta i no kasem 5,000 Vatu.

OL DEITLAEN BLONG SENDEM OL VAT RITEN I KAM LONG VAT OFIS

Taem we yu rejista long saed blong VAT bambae mifala i sendem wan buk we i gat ol VAT ritin insaed.

Deitlaen blong sendem ol ritin i kam long mifala mo blong mekem ol peimen hemi long namba 27 dei blong evri manis folem end blong takisebol period blong yu. Sipos namba 27 dei blong manis hemi foldaon stret long wan wiken o pablik holidei, bambae deitlaen hemi stap long nekis dei blong wok we i folem wiken o pablik

holidei ia. Deitlaen blong sendem ritin blong yu blong takisebol period we i finis long 30 Novemba hemi namba 5 Januari blong nekis yia. Sipos namba 5 Januari hemi foldaon long wan wiken o wan pablik holidei, bambae deitlaen hemi stap long nekis dei blong wok we i folem wiken o pablik holidei ia.

WANEM NAO WAN MAN WE I REJISTA I MAS MEKEM

I gat sam rul we ol man we oli rejista long saed blong VAT oli mas folem, olsem:

- Yu mas kipim gud ol rikod. Sipos yu wantem kipim ol rikod blong yu aotsaed long Vanuatu, yu mas raetem wan leta i kam long VAT Ofis blong kasem apruvol blong olgeta fastaem.
- Yu mas pruvum VAT ol takisebol saplae we yu salem o we yu pem.
- Yu mas fulmap ol VAT ritin mo pem takis long stret taem bifo deitlaen i pas.
- Yu mas givim ol takis inouis long eni narafala man we i rejista bifo 28 dei i pas afta we hemi askem inouis ia.
- Yu mas talemaot long VAT Ofis abaot eni jenis we i tekemples insaed long bisnis, olsem adres o takisebol aktiviti blong yu i jenis.
- Sipos yu stap tingting blong stopem **evri** takisebol aktiviti blong yu, yu mas talemaot long VAT Ofis bifo 21 dei i pas.

Sipos yu no folem ol rul ia bambae yu save pem sam moa takis mo/o faen we VAT Ofis bai i jasem.

OLSEM WANEM BLONG FULMAP VAT REJISTREISEN FOM

Sipos yu faenemaot se yu mas rejista long saed blong VAT o yu wantem rejista folem tingting blong yuwan nomo, yu mas fulmap Aplikeisen blong Rejistreisen Fom (CT 201) we i avelebol long VAT Ofis.

Yu mas sendem aplikeisen ia i kam long VAT Ofis insaed long Dipatmen blong Kastoms mo Inlan Revenu long adres ia :

*Dipatmen blong Kastom mo Inlan Reveniu
VAT Ofis
Praevet Meil Bag 9012
Port Vila
Vanuatu.
Telefon 24573 Faks 24574*

AFTA BAMBAE WANEM I HAPEN?

Taem mifala i jekem evri ditel blong rejistreisen fom blong yu, bambae mifala i sendem wan buklet blong Gaed blong VAT long yu (we hemi wan jenerol gaed blong olsem wanem VAT i wok) mo wan notis blong talemaot long yu se yu rejista. Pepa ia bambae i soem ol samting ia :

- rejistreisen namba blong yu
- deit we yu rejista
- deitlaen blong fes riten blong yu.

Bambae mifala i sendem wan buk tu we i gat ol VAT riten insaed i kam long yu taem yu rejista long saed blong VAT. Yu mas fulmap mo sendem olgeta i kam long VAT Ofis bifo deitlaen i pas.

Sipos yu wantem save moa infomeisen bifo yu disaed blong rejista o no, yu save kontaktem VAT Ofis insaed long Dipatmen blong Kastoms mo Inlan Reveniu.

Be yu save toktok wetem wan bisnis advaes, alkaonten o wan narafala man we i save gud bisnis blong takis blong save moa infomeisen.

PAT TRI - SAM MOA HELP MO/O INFOMEISEN

Bambae mifala i glad nomo blong kam visitim bisnis blong yu blong save givim yu ol infomeisen abaot :

- wanem kaen rikod blong kipim
- olsem wanem blong fulmap ol VAT riten fom
- wanem taem blong sendem bak ol riten fom mo mekem peimen.

Sipos yu nidim wan ofisa blong kam visitim yu o blong atendem wan miting, yu mas ansa "yes" long kwesten insaed long Aplikeisen blong Rejistreisen we i askem yu sipos yu wantem wan ofisa blong VAT Ofis i kam givim advaes long yu long saed blong Valiu Aded Takis. Blong faenemaot moa infomeisen abaot sevis ia o blong mekem wan apoenmen, yu save kontaktem VAT Ofis long Dipatmen blong Kastoms mo Inlan Reveniu.

Sipos yu wantem wan kopi blong Loa blong Valiu Aded Takis o VAT Akt Namba 12 blong 1998, yu save kam long VAT Ofis mo pem 1,000 vatu long wan.